

तीतस

ब्रेक्ब मुर: एको चिठी पावलमी आ नु गेय पाइब तीतस कली ब्रेक्शो बाक्त।

गेना ब्रेक्शो: पावल रोम सहर डा जेलखान रे प्रोंइचा पुंइसे नोले क्रेट टापु लमाक्त। मेकेर मुर आन कली शेंचा कली तीतस कली वोइश्शो बाक्त। एको चिठी ६५ ए. डी.मी तीतस कली ब्रेक्शो बाक्त।

मारदे ब्रेक्शो:

१. थमा सुइक्ब आन शेंब दोदेशो दुम्चा माल्नीमी।
२. थमा सुइक्ब आन कली शेंतीके रिम्शो दुम्चा माल्नीम।
हुकुम पाइब आन कली टिचा माल्नीम।
दूली शेंब आन पर्बम होस पचा माल्नीम।

डोंइती डा लोव

1 गो परमप्रभु यावे आ वाइल नु येसु ख्रीस्त आ सोइश्शो, थमा सुइक्ब पावल नड। परमप्रभु यावे आ योव्रशो मुर आन कली थमा सुइक्चा आ पर्बम शेंतीक नु मेको तुइश्शो रे रिम्शो गेय पचा माल्ब, दे शेंब दुम्ती।

2 मोदेशो दुम्मेनु, गो नेल्ल गेना हना यो परमप्रभु यावे नु बाक्शा ब्रोंइनय, दे आस पाइनय। २तिमोथी २:१३

3 आ दाक्शो ना मुर आन कली आ लोव तुइक्पाइक्तु। दोपा तुइक्पाइक्तु देशा हना, इं मरिम्शो गेय रे प्रोंइब परमप्रभु यावेम “आं लोव शेंदीमी” देंत। एफिसी १:९-१०

4 तीतस, एको चिठी इ कली ब्रेक्ताक्ड। गो निक्शी इस के थमा सुइक्तीक का दुम्शा, गे आं तौ खोदेशो दुम्ते। इं आफ परमप्रभु यावे नु इं पाप रे प्रोंइब येसु ख्रीस्तमी इ कली शिशी नु थुं नाइक्चा गेम्सेक्ल। १तिमोथी १:२

थमा सुइक्ब आन कली कोव्रब

५ गो इ कली क्रेट टापुमी मारदे वोइक्तन देंशा हना “गे थमा सुइक्ब आन दातेमी ठीक मदुम्शो गेय ठीक पपतो। मिनु सहर सहर डा गुम्तीकेमी शेंब खाल्पापुकी वोतो” दे इ कली अरेतन। प्रेरित १४:२३

६ मिनु गुम्तीक खिं डा शेंब खाल्पापुकी सु सु दुम्ने चाप्नीमी देंशा हना, काइ दोस गेचा मपुंडसीब नु मीश का ला पाइश्शो वोंइश मुर बाक्चा माल्ब। मेको आ तमी तौ थमा सुइक्ब बाक्चा माल्नीम। हेंथे गाक्ब नु मटीब आल आन आफ गुम्तीक खिं डा शेंब खाल्पा दुम्ने मचाप्नीम। १तिमोथी ३:१-७

७ मोदेशो थमा सुइक्ब आन कली कोव्रब परमप्रभु यावे आ खिं डा गेय पाइब दुम्शा, दोस गेचा मपुंडसीब बाक्चा माल्ब। मिनु ठेयब लेश्शो, शुश गाइक्ब, राकसी शांबु तूशा दुक्ब, चुरशा गुइ प्रोंइब नु शिंम मुरुम मेको गेय पने मचाप्नीम। १कोरिन्थी ४:१; २तिमोथी २:२४

८ थमा सुइक्ब आन कली कोव्रब चहिं बास गेब, रिम्शो गेय दाक्ब, रिम्शो नु मरिम्शो तुइक्ब, ठीक गेय पाइब, थमा पा परमप्रभु आ गेय पाइब नु आंम रां चलेस जोक्ब मुर बाक्चा माल्नीम।

९ मोदेशो पाइब मुर परमप्रभु यावे आ लोव्र डा शेंतीक तुइश्शा पचा माल्नीम। मोपा मेकोपुकीमी थमा सुइक्ब आन कली रिम्शो शेंशा, अरेने चाप्नीम। मिनु परमप्रभु यावे आ लोव्र दूली शेंब आन कली यो रिम्शो सेल्ने चाप्नीम।

दूली शेंब आन पर्बम

१० परमप्रभु यावे आ शेंशो लोव्र मटीबपुकी शुश बाक्नीमी। शोर गाक्शो लोव्र पाइब नु हेंथे लां शेंब बाक्नीम। मेको शुश खोइक्तीक चिनु पाइश्शो इस्राएली बाक्नीम।

11 मोदेशो मुर आन कली ब्वालेइ पपाइक्चा मालनीम। मारदे हना खिं खिं डा मुर नेल्ल आन कली जिपाइक्नीमी। मिनु क्येट चेम्चा कली शेंनीमी।

12 क्रेट टापु डा शुश जोक्ब मुरुमी आंम मुर आन पबर्म मार लोव्र पवा बाक्त देशा हना, मेकोमी “क्रेट डा मुरपुकी गेना हना यो जोल पाइब, मरिम्शो पाइब जन्तु, शुश जाइब ब्वाइब नु अल्सी अल्से बाक्नीमी” दे लोव्र पवा बाक्त।

13 मेको आ देशो थमा बाक्ब। मोपतीके गे मेको आन कली शुश अरेवो। मोपा ला आन थमा सुइक्तीके ठीक दुम्ने चाप्ब। रतिमोथी ४:२

14 मिनु थमा सुइक्बपुकीमी यहूदी आन कथा नु मुरुम सेल्शो अरेशो लोव्र नेंचा मदुम्ब। मेको थमा लां प्रोइब बाक्नीम। १तिमोथी ४:७; रतिमोथी ४:४

15 रिम्शो मुर आन कली मारेइ मारेइ रिम्शो बाक्ब। ग्रांग्रा दिचा डा मुर नु थमा मसुइक्ब आन कली चहिं मारेइ मारेइ रिम्शो मबाक्ब। मेको आन थुं नु मिम्तीके मरिम्शो बाक्ब। मत्ती १५:११; रोमी १४:२०

16 मिनु मेकोपुकीमी “गो परमप्रभु यावे कली तुइक्नुड” देखु पाइनीमी। तन्न आन पतीकेमी मतुइक्ब बाक्नीम, दे तुंइसीब। मोपा मेकोपुकी ग्रांग्रा दिचा डा मुर बाक्नीम। मिनु मटीब दुम्शा, रिम्शो गेय यो पने मचाप्नीम। रतिमोथी ३:५

2

ग्रुम्तीकेमी दोपा बाक्चा

1 गे चहिं येसु ख्रीस्त आ ठीक लोव्र रिम्शो पा मुर आन कली शेंदीमी। रतिमोथी १:१३

2 गे खाल्पा आन कली मार शेंचा माल्नेवे देशा हना, रिम्शो मिम्ने चाप्ब, मान पाइक्चा शिरशो मुर, गेय पचा क्येडा डोंइती मिम्ब,

आन थमा सुइक्चा, आन दाक्चा नु आन फाल्चा डा सक्ति ठीक दुम्शा बाक्चा माल्नीम, दे शेंचा माल्नेवे। १तिमोथी ५:१

3 मिनु खाल्पी आन कली मार शेंचा माल्नेवे देशा हना, खाल्पीपुकी रिम्शो थमा सुइक्ब दुम्चा माल्नीम। हेंथे लोव्र पचा मदुम्ब। शुश शांबु तूचा मदुम्ब। खाल्पीपुकी रिम्शो गेय शेंब दुम्चा माल्नीमी।

4 मोदेशो पा खाल्पीपुकीमी आन क्येडा आल मीश मुर आन कली आन वोंइश नु आन आल आन कली दाक्चा माल्ब, दे शेंचा माल्नीम।

5 गेय पचा क्येडा डोंइती मिम्चा, आंम वोंइश नु ला बाक्चा, खिं डा गेय रिम्शो पचा, मुर नु रिम्शो दुम्चा, आंम वोंइश कली टिचा, दे शेंचा माल्नीम। मोदेशो पाम्तेक्म हना, मुरपुकीमी परमप्रभु यावे आ लोव्र आ पब्रम मरिम्शो लोव्र मपाइनीमी। एफिसी ५:२२

6 मोदेशो पा गे इ क्येडा आल वोंइश मुर आन कली “गेय पचा क्येडा डोंइती मिम्चा माल्ब” दे शेंचा माल्नेवे।

7 मिनु नेल्ल क्येडा ठेयब मार बाक्ब देशा हना, गे रिम्शो गेय पशा, थमा सुइक्बपुकी दोदेशो मुर बाक्नीमी, दे कोइचा माल्नेवे। मिनु मुर आन कली शेंदीनु, हेंथे लोव्र मपथु, रिम्शो शेंतीक शेंचा माल्नेवे। २तिमोथी २:१५; १पत्रुस २:१५; १तिमोथी ४:१२; १पत्रुस ५:२

8 गे रिम्शो लोव्र शेंताक्वी हना, सुइमी इ कली दोस गेने मचाप्नीम। मिनु इ कली मदाक्बमी यो इ पब्रम मारेइ मरिम्शो लोव्र पचा मताइनीम। मिनु आन मुने दोक्नीम।

9 मिनु वाइलीम वाइल आन कली मार शेंचा माल्नेवे देशा हना, आंम ठेयब मुर आन लोव्र टिचा माल्नीम। आन गेय रिम्शो पा आन ठेयब मुर आन कली ग्येरपाइक्चा माल्नीम। आन ठेयब मुरुमी लोव्र पामेनु, मेकोपुकीम जोप पचा मदुम्नीमी। एफिसी ६:५-६१; १तिमोथी ६:१-२; १पत्रुस २:१८

10 खुइ पचा मदुम्ब, नेल्ल गेयमी थम रिम्शो पाइब दुम्चा माल्नीमी। मोदेशो रिम्शो गेय पा इं कली पाप रे प्रोइब परमप्रभु यावे आ शेंतीके रिम्शो लोव बाक्ब, दे कोइनीमी। मेको शेंचा माल्नेवे।

परमप्रभु यावे आ शिशी

11 परमप्रभु यावे आ शिशी मुर नेल्ल आन कली पाप रे प्रोइचा कली तपांडसाक्व। तीतस ३:४

12 मोदेशो शिशीमी इं कली परमप्रभु यावे कली मगारचा डा गेय नु रागी रागी डा मुर आन पतीके आ पर्बम मोदेशो मपचा, दे शेंब। मिनु मुल गेय पचा क्येडा डोइती मिम्चा, ठीक गेय पचा नु रागीम बाक्शा, परमप्रभु यावे कली मान पा हिंचा, दे शेंब।

13 मोदेशो दुम्शा, मान ताइब परमप्रभु यावे नु इं कली पाप रे प्रोइब येसु ख्रीस्त आ छेडछेड गूब, दे गो आस पशा रिम्नय। १कोरिन्थी १:७; फिलिप्पी ३:२०; १थिस्सलोनीकी १:१०

14 येसु ख्रीस्तम आंम कली काइ ममिम्थु, साइक्चा पुंडसाक्व। मारदे साइक्चा पुंडसाक्व देशा हना, इं कली मटितीके रे प्रोइचा कली साइक्चा पुंडसाक्व। मिनु इं कली परमप्रभु यावे आ योव्रशो मुर सेल्चा नु इं कली शुश रिम्शो गेय पपाइक्चा कली आंम कली साइक्चा, दे जिम्मा गेसाक्व। गलाती १:४; १तिमोथी २:६; प्रस्थान १९:५; एफिसी २:१०

15 मेको लोव शेंदीमी। मिनु गे अधिकार पाइश्शो दुम्शा, मुर आन कली अरेवो। मिनु मुरपुकीमी “एको ठिटामी आंइ कली शेंने मचाप्ब” देंचा मपुंडसो। १तिमोथी ४:१२

3

रागीम दोपा बाक्चा माल्नीमी

1 मिनु गेमी हुकुम पाइब नु सरकार डा अधिकार पाइश्शो मुर आन कली टिचा, दे थमा सुइक्ब आन कली मिम्पतो। थमा

सुइक्बपुकी टीब मुर दुम्चा माल्नीम। मिनु मार मार रिम्शो गेय बाक्मे, मेको पचा माल्नीम। रोमी १३:१; १पत्रुस २:१३

2 मिनु सुइ आन पर्बम काइ शुक्शी मपचा, जिचा मपोक्चा, मुर आन कली रिम्शो पा फाल्चा, ठेयब मलेत्थु, मुर आन कली वारच पचा माल्नीम। फिलिप्पी ४:५

3 डोंइती गो मरुप्ब बाक्तय। परमप्रभु यावे कली मटीब बाक्तय, हेंथे गाक्ब, मार मार दाक्तय, मेको दला दाक्स पाइब बाक्तय। ग्रांग्रा दिचा डा गेय पाइब बाक्तय। गो मरिम्शो पा गेहे पाइतय। मिनु गोपुकी काइ मदाक्मुय। १कोरिन्थी ६:११; एफिसी २:२; एफिसी ५:८; १पत्रुस ४:३

4 तन्न पाप रे प्रोंइब परमप्रभु यावे आ रिम्शो पतीके, आ दाक्तीके नु शिशी जाक्त। तीतस २:११

5 मेकोमी इं कली मरिम्शो गेय रे प्रोंइतु। इं पशो ठीक गेय तशा मप्रोन, तन्न आ शिशीमी इं कली प्रोंइतु। दोपा पाप रे प्रोंइतु देंशा हना, इं कली मरिम्शो गेय रे चिक्शो खोदेशो पा, आ सोक्त आ पशोमी नक मुर सेल्लु। योएल ३:१; २तिमोथी १:९; यूहन्ना ३:५; एफिसी ५:२६

6 मिनु परमप्रभु यावेमी आ सोक्त इं तारी मोइक्तु। दोपा मोइक्तु देंशा हना, इं पाप रे प्रोंइब येसु ख्रीस्त आ पतीकेमी मोइक्तु।

7 मोदेशो पा, परमप्रभु यावे आ शिशी आ पतीकेम इं कली ठीक सेल्लु। मिनु परमप्रभु यावे नु बाक्चा शिरशो दुम्तय। परमप्रभु यावे नु गेना हना यो बाक्चा कली आस पा बाक्तय। रोमी ३:२६

8 एको लोव्र थमा बाक्ब। मिनु एको लोव्र शुश शेंदो। मोदेशो पा शेंताक्वी हना, परमप्रभु यावे कली थमा सुइक्ब दुम्शो मुरपुकी रिम्शो गेय पचा कली होस पा बाक्नीम। आं देंशो शेंतीके मुर आन कली रिम्शो नु गारचा डा बाक्ब।

9 मिनु गे मूर्ख खोदेशो पा हिल्लो पतीके, यहूदी आन बडसावली डा शेंतीके नु अरेतीक लोव्र रे सेल्लो पतीके आ पर्बम गाइक्पाइक्ब

नु जिचा पोक्ब रे डोन बाक्को। मारदे हना मेको शोर गाक्शो नु जाम्शा लाइब बाक्नीम। १तिमोथी १:४; १तिमोथी ४:७; २तिमोथी २:१४

10 गे मोदेशो दूली शेंब आन कली खेयप निक्शी सम्म लोव्र पावो। मेकोम मटिप्टु हना, मेको रे डोन बाक्को। २यूहन्ना १०; मत्ती १८:१५-१७

11 मोदेशो मुर नेल्ल दूली नु मरिम्शो पाइब दुम्शा, आन मरिम्शो पतीकेमी आंम कली खतम सेल्ब बाक्नीम, दे तुइक्नेवे। १तिमोथी ६:४-५

नोले डा लोव्र

12 गो अरतीमास हना यो, तिखीकस हना यो इ कली गुम्चा कली सोइक्ताक्ड हना, गे आं कली गुम्चा कली निकोपोलीस सहर पिवो। मारदे हना गो हिउंदमी मेकेर बाक्चा कली मिम्ताक्ड। एफिसी ६:२१

13 मिनु गे चीनास माइश्शो वोकील नु आपोल्लोस आस कली रीब पा सोइक्तीम्सी। मेको निक्शीम मार मार माल्नीसी, मेको आस कली गेम्सी। प्रेरित १८:२४; १कोरिन्थी ३:५-६

14 मिनु इं मुरपुकीमी यो रिम्शो गेय पचा कली शेंसीचा माल्नीमी। मोपा शुश श्येत जाइब आन कली वारच पशा, फल सिप्ब रवा खोदेशो दुम्नीम। तीतस २:१४; मत्ती ७:१९

15 गो नु बाक्बपुकी नेल्लेमी इ कली “रिम्शो बाक्को” दे ब्रेक्पाइक्तीमी। आंइ कली दाक्ब थमा सुइक्ब नेल्ल आन कली “रिम्शो बाक्कीन” ने माइक्मी। परमप्रभु यावे आ शिशी गे नेल्ल नु लील।

परमप्रभु यावे आ लोव

Bible in Sunwar (NP:suz:Sunwar)

copyright © 2011 Wycliffe Bible Translators, Inc.

Language: Sunwar

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789937101646

The Bible without Deuterocanon

in Sunwar

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 19 Dec 2025 from source files
dated 29 Jan 2022

27cd6a1c-0244-5add-a4e8-b4f0e5104473